

132
ure
i
au
ua
na
hia
pa
apî
esu
nei
pa

te
ea
u-

au
"
a-
aa

aa
a,i
A-
ae
ei,
a-
te
ta
ti.

iti

TE NEHEURAA API

I neia i te piha neneiraa no te Ekalesia a Iesu Mesia i te Feia Mo'a i
te Mau Mahana Hopea Nei i Papeete, Tahiti, i te mau fenua Sotaiete,
i te mau avae atoa. Te hoo e piti farani i te matabiti hoê.

Nu. 12.

Ditema, 1920

Mat. 14.

Na Mana e Piti e Vai Nei.

Mai te tau o Adamu e tae roa mai i teie nei â mahana,
ua vai noa na mana e piti i te ao nei; te hoê, o te mana ia o
te Atua e te tahi, o te mana ia o te diabololo. E ia haamatahia
te hoê ohipa a te Atua i te tupu i roto i te hoê vahi, e tupu
noa te patoi a Satani i reira e e tamata noa ia mana ia huri i
taua ohipa ra i raro. E no reira, e mata na tatou i te hiopo-
araa i taua na mana ra e vai nei na nia iho i te tiaraa o te E-
vanelia mau, ia ite tatou i te vairaa no taua na mana ra.

Tei ia vai te mana ia rave i te mau semeio; te semeio ra-
rahi e te iti hoi? Tei te Atua ia e tei te diabololo hoi no te mea
e, o na mana rahi e piti teie e vai nei i teie nei ao. Te faa-
tia nei te Atua i te diabololo ia rave noa i te hoê mau ohipa
maere rahi i te ao nei ei tamataraa i te taata, ia taa maitai i
te taata te maitai e te ino. E vî roa ra taua mana o te diabololo
ra i te mana o te Atua, e e tia noa i te Atua ia faaore roa'tu
i te mana o te diabololo ra, i te mea e, tei nia roa'tu te mana
o te Atua i to Satani mana ra. E haamana'o râ tatou e, o te
mana o te Atua ana'e ia ta tatou e auraro eiaha roa'tu râ ta-
tou ia auraro i te mana o te diabololo. E ora tatou i to te Atua
ra mana e e pohe tatou i to Satani ra mana. Tei ia tatou nei
râ te maiti i te mana o Satani e aore râ te mana a te Atua ra,
o tei au i to tatou tiamâ.

Ua riro te mana o Satani ei katararaa i to te ao nei,

mai te mahana i hurihia ai Adamu ma i rapae i te ô i Etene ra, e tae roa mai i teie nei â mahana. E vai â hoi taua mana o te diabolō ra i roto i teie nei ao, e tae roa'tu i te tau e taamuhia ai te diabolō i roto i to'na ra fifi.

E hiopoa tatou i te huru o taua mau mea i nia nei ra i te tau no Pharaō e to Aiphiti ra. Ua rave te Atua i te mau semeio rahi e te maere na roto i to'na ra na tavini o Mose raua o Aarona o tei mau i te mana o te autahu'araa mo'a. E ia oti taua na Semeio rahi ra i te raveraahia ua pii mai Pharaō i to'na mau taata tahutahu, e ua rave ratou i taua na semeio ihora, hoê ana'e huru te rahi e te maere. Ua rave râ ratou i taua mau semeio ra i te mana o te diabolō, area râ e upootia to te Atua mana i nia a'e i to Satani i te mea e, e mea auraro te mana o Satani i to te Fatu ra mana. Ua tuu atura te Atua i te mau pohe e huru rau i nia iho i to Aiphiti i te reira tau, e i muri rii mai i te tuuraahia, ua faaue ihora Pharaō i to'na mau taata tahutahu o te diabolō ra ia rave i te reira iho mau mea, e ua na reira hoi ratou. A hiopoa maite outou i te raveraa. Mai teie te huru, ua "haere atura Mose raua Aarona i roto ia Pharaō ra; ua na reira hoi raua mai ta Iehova i faaue mai ia raua ra; ua titiri atura hoi Aarona i ta'na raau i raro i mua i te aro o Pharaō, ei mua atoa hoi i te aro o to'na ra mau tavini e riro atura ia ei ophi. Ua haaputu maira Pharaō i te mau taata paari o Aiphiti e te feia tahutahu. E mai te reira atoa to te mau taata peu paari no Aiphiti i rave i ta ratou ra mau peu; ua titiri ana'e hoi ratou i ta ratou atoa ra mau raau i raro e riro atura hoi te reira ei ophi ana'e; area te raau a Aarona, horomii atura ia i taua mau raau na ratou ra." A hio i te Etoto 7:10-22. Ua faariro ana'e te Atua i te mau pape no Aiphiti ei toto na roto i to'na ra na tavini e mai te reira atoa hoi ta te feia tahutahu e ta te mau tahu'a faariroraa i te mau pape atoa ei toto ana'e ra. Ua faaî roa te Atua i taua fenua i te ati rana e ua ati roa ta-

ua fenua ra i te rana, ua i roa te mau pape i te rana e ua ha-
ere noa ratou i te mau vahi atoa, e ua tomo atoa ia i roto i te
mau fare atoa, ua i ana'e te mau piha taotoraa, te mau roi,
te mau tahuraa maa, te mau o'iraa maa ra, te mau vahi atoa
ua i ino roa ana'e ia i te reira ati rana. E mai te reira atoa
ta te mau tahu'a e te feia tahutahu i rave i ta ratou ra mau
peu, e ua tae roa mai te rana i nia iho i taua fenua ra o Ai-
phiti. A hio i te Etoto 8:2-14.

Ua haaati te Atua i to Aiphiti i te ati utu na roto i
to'na ra na tavini o Mose i taua Aaron, ua aa Aaron i to'na
ra raau e ua tairi i te repo puehu o te fenua ra, e ua riro atu-
ra ia ei utu e ati noa'e te fenua'toa ra o Aiphiti; ua hope
roa te repo puehu i te riro ei utu; ei i nia iho hoi te utu i te mau
puaa e te mau taata e i te mau vahi atoa ra, e i reira te mau
taata tahutahu i na ô mai ai e, "O te rima mana teie o te
Atua". Ua rahi roa'tu te mana o te Atua ra i reira i to te
mana o taua mau tahu'a e te mau taata tahutahu ra. A hio
i te Exodo 8:16-19.

E i reira ua tuu pinepine faahou mai te Atua i te mau
pohe e te mau ati i nia iho i taua fenua ra o Aiphiti ra, mai
te ati o te tiaa popoti, e te ati o te poheraa o te mau puaa, te
mau puaahorofenua, te mau asini, te mau kamela, te mau
puaatoro e te mau mamoe; e pohe rahi roa ia. Ua tuu mai
hoi te Atua i te ati fefe i nia i te reira fenua ra, e te ati ûa-
paari atoa hoi; i te titooraa'tu o Mose i to'na raau i nia i te
ra'i ra, o te pativi maira ia Iehova, e te ûa-paari, e te uira i
te horo-noa-raa na raro i te repo ra. O te ûa-paari e te uira
i te anoi-atoa-raahia i taua ûa-paari ra, e e mea u'ana rahi
roa ia. Aore roa e faito i taua fenua'toa ra o Aiphiti mai te
matamua mai. E ua tuu-atoa-hia mai e te Atua te hoê ati
mata'i i nia i taua fenua ra ia pau roa ia. O te hoê mata'i i
faafararahia maira, mai te hitia o te ra mai i te afairaa maira
i te mau manu rii aamu i te mau raau rii i toe ra. Ua ati roa
taua fenua ra i taua manu ra, e pouri roa'tura te fenua. Ua
tup atoa te Atua i te hoê ati pouri taotao i nia i taua fenua

ra e ua vai noa ĩa e hope a'era na rui e toru ra. A hio i te Exodo 8:21-24; 9:3-7-8-11, 22-27; 10:13-15, 22-23.

E te tumu te Atua i na reira ai i te faatupuraa e te faatiaraa i taua mau mea i parauhia a'enei, no te faaiteraa'tu ĩa i to'na mana, e ia faaitehia to'na i'oa e ati noa'e te ao atoa nei. E aore roa'tu i tia, e hoê iti a'é, i taua mau tahu'a e taua mau taata tahutahu ra ia rave i te mau semeio i hau atu i to te Atua ra. Aore a'era hoi e mana to ratou i nia iho i to te Atua ra mana, e aita'tu â hoi to ratou ei mana i nia i te fefe ra; tei nia atoa hoi i te feia tahutahu taua fefe ra e tei nia'toa i to Aiphiti atoa ra e ati noa'e. E ua tii mai ra Pharao ia Mose raua Aarona, e ua parau maira oia ia raua ra e, Ua hara roa vau i teie nei; tei Iehova ana'e e ia outou hoi te parau tia ra e te mana mau ra; o vau râ te ino e to'u mau taata atoa ra. Ua ite roa oia e, no te diabololo to ratou mana e ta ratou mau ohipa i faatiahia, ua na roto ana'e hoi ĩa i te mana o te diabololo ra. A hio i te Exodo 9:11, 16: 27.

Ua ĩ roa te mau papairaa mo'a ra i te mau parau o te faaite i te taata e, eiaha e tiaturi i te mana o te diabololo. Ua tohubia i roto i te Mataio te hoê tohu-faaaraararaa no te mau mahana nei. Te na ô maira taua tohu ra e, "E mesia haavare hoi te tia mai i nia, e te peropheta haavare, e ua rave i te tapao e te semeio rahi, e tae noa'tu i te vare i te feia maitihia ra, ahiri i tia." E hio maitai tatou, e e ara maite, eiaha roa tatou ia vare. Te tupu pinepine noa nei taua mau mea ra i teie nei â mahana. E ara â tatou o te riro tatou ia Satani e i to'na ra mana. A hio i te Mataio 24:24. E te mau taata o te mau i taua mana haavare o Satani ra, eiaha e tiatuti ia ratou ia faaora ia outou na. Te vai nei te ravea e itehia ai te peropheta mau o tei mau i te mana mau o te Atua ra e a faaroo maite ia'na. Te na ô atoa maira te Tesalonia piti e, e tae mai te hoê tei ia'na te mana haavare ei rave i te mau tapao, e te mau semeio haavare ra, e te ia'na te mau parau-tia ore haavare atoa ra. A hio i te 2 Tesalonia 2:9-12. E a ara maitai i teie mau ohipa ta Satani e ohipa na roto i to'na ra mana. Eiaha roa'tu ia vare e hoê iti a'e ia'na.

Te faaara atoa nei te Korinetia piti i te taata paatoa eiaha e vare i te Satani ra ohipa mana e te maere ra. E ara tatou i teie mau mahana hopea nei no te mea ra e, te tupu noanei â te mau mea ta to tahito ra i tohu mai ra. E te diabololo ra, e faahua melahi o te maramarama ia oia e e ohipa rahi e te maere ia ta'na e rave na rotoi to'na ra mana. A hio i te I I Kor. 11: 13-16. Te na ô atoa maira te Apokalupo e, e tupu te hoê, tei ia'na te mana rahi e e rave oia i te mau tapao rahi, e e pii atu oia i te auahi e mairi mai no nia mai i te ra'i ra e e na reira hoi ia. A hio i te Apok. 13:13. E ua ite atoa Ioane i na varua o na demoni i te raveraa i te mau semeio e te ohipa maere rahi ra. Apok. 16:13-15. Na te diabololo ana'e hoi te reira mana, aita atu â mana to'na maori râ te mana iino ana'e. E pohe ana'e te taata ia tiaturi ratou i taua mana ra, e aore roa e maitai e itehia na roto i te haapaôraa i te reira.

Te mau peu tahutahu te mau peu tahu'a, e te mau peu hi'ohi'o, e ere ia i ta te Atua; aita roa'tu te Atua i maururu e hoê iti a'e i te reira. No te diapololo mai hoi to ratou mana, eiaha râ no ô mai i te Atua ra. Te haavare nei ia i te taata e te faatitî nei ia ia ratou, e te aratai atoa nei hoi ia ratou i roto i te ati e te pohe e te mau ino e huru rau. E ere hoi ia i te mea tia i mua i te Atua ra, i te peu e, na te reira e aratai ê atu i te taata i te peeraa'tu ia Satani e i te haapaeraa i ta te Atua ra. Aore roa'tu te parau mau i roto i te mau tahutahu e te mau tahu'a, te haavare nei râ ratou na roto i te mau parau navenave. Te titau nei ratou e aratai ê atu i te feia a te Atua o te faaroo mau Ia'na ra.

Ua faahapa puai Paulo i te hoê taata tahutahu o Elima to'na io'a, o tei titau i te faafariu ê atu i te tiaau i te faaroo. Ua faahapa atu Paulo, o tei i te Varua Maitai, i taua taata tahutahu ra, mai te parau atu ia'na e, "Aue oe i i te haavare e te ino e, e te fanau'a a te dibolo e, e enemi oe no te mau parau-tia atoa nei, eita oe e faaea i te haapi'o i te parau titiaifaro a te Fatu nei?"

Ua tuubia te rima o te Fatu i nia iho i tana taata ra e ua matapohia oia e ua roohia ihora oia i te arehurehu e te poiri i reira ra; e ua perehahu haere atura oia i te maimiraa i te hoê taata ei aratai ia'na i te rima ra. A hio i te Ohipa 13 6-12.

I te oire ra o Simona te parahi ra te hoê taata, e tahutahu na i mutaa ihora e te na ô raa ia'na iho e taata rahi roa, e ua tiaturi rahi roa te mau taata ia'na, o ratou e hope roa'e i te na ô raa atu e, "O te mana rahi o te Atua teie nei taata." Area râ e mana haavare to'na no ô mai ia Satani; e ua itehia i reira e, ua rahi to te Atua mana i to'na. A hio i te Ohipa 8:9-13.

I te anotau no to Iseraela i tahito ê ra, ua horoa te Atua i te hoê ture ia ratou i te faaiteraa atu ia ratou ra e, eiaha e tiaturi i te hi'ohi'o, te feia varua ino, te tahutahu, te tahu'a peu paari, te pifao, te teraphima, te hebere, e te taura ra. Ua parau râ te Atua e, na te diabolou ratou e to ratou mana e e mea faufau ia i mua ia'na; e ua faaauhia ia ratou e ana, i te auahi na Moloha. Te na ô mai ra te hoê o taua na faaue-raa ia Iseraela i tahito ê ra e, "Eiaha outou e haapao i te feia varua ino ra, e eiaha e imi i te taata hi'ohi'o ia viivii outou i te reira: O vau o to outou Atua ra o Iehova." A hio i te Lev. 19:31. E no reira o te Atua ana'e ia ta tatou e haapao e tiaturi. Eiaha roa'tu taua huru taata faufau ra i parauhia a'enei ia tiaturihia. E feia mana rahi e te maere noa'tu â ratou, eiaha, eiaha, eiaha roa'tu e tiaturi ia ratou no te ora. E hau roa'tu ia i te maitai ia pohe i te pae tino nei i roto i te tiaturiraa i te Atua e to'na mana i to te faaoraraahia i te pae tino nei na roto i te tiaturiraa e te faaoraraa i taua mana o Satani ra. E teie mau faaue-raa i faauehia'i to Iseraela ra, ua tia hoi ia ia tatou e haapao i teie nei â mau mahana hopea nei. Te vai nei hoi te ture apî no te Etaretia nei e e ere roa ia i te mea tia e hoê iti a'e ia tiaturi e ia haapao i taua mau huru taata i parauhia i nia nei. "E te taata e fariu tia i te feia varua ino, e te mau taata hi'ohi'o i te peeraa'tu

ia ratou, e ta no maite tau mata i te reira taata, e tãpũ e atu vau ia'na i to'na ra nunaa." A hio i te Lev. 20: 6-8.

Na taua mau irava ra e faaite atu i te mea e tia ia tiaturihia e ia haapaohia. Tena ô atoa maira o Iehova e, "Ei feia mo'a outou no'u: no te mea, te mo'a nei au o Iehova, e ua faataa vau ia outou i te taata'toa, ei taata no'u. E teie nei, o te taue varua ino, e te vahine varua ino, e te taata hi'ohi'o, e pohe roa ia; e tuihia ia te reira i te ofai: ei nia ia ratou iho to ratou pohe." A hio i te Lev. 20: 26-27.

E teie mau vahi atoa nei ua papaihia ia e Mose i roto i i taua na Buka a Mose ra, mai te au i te faaueraa ta te Atua i horoa'tu ia Iseraela ra; e e riro te reira e faaiteraa e, aore roa te Atua i mauruuru e aore hoi oia i faatia itana ohipa ra. E ua parau atura te Atua i te parau faaaraararaa i to Iseraela i to ratou haereraa mai Aiphiti atu i te fenua i parauhia ra, no te mea e, ua ite te Atua e, te vai ra i taua fenua ra te mau peu haavare o taua mau diabololo ra; e ua parau atura Oia e, "Ia tae oe i te fenua ta to Atua ra ta Iehova e horoa mai no oe ra, eiaha oe e haapii i te rave i te mau mea faufau a taua mau fenua ra. Eiaha roa te hoê i roto ia outou e hopoi i ta'na tamaiti e ta'na tamahine i roto i te auahi na Moloha, eiaha hoi ei pifao, e te hi'o ata, e tei imi i te tapao, e te hi'ohi'o, e te hebere, e te feia imi i te varua ino, e te taura, e te feia uiui i tei pohe ra. O te feia atoa hoi i rave i te reira ra mau peu, e feia faufau ia na Iehova, e no te reira ra mau mea faufau i tiavaru ai to Atua ra o Iehova ia ratou i mua ia oe ra. Ei to Atua mau iho â oe ei ia Iehova; o teie nei mau fenua e riro ia oe nei, i faaroo noa na ratou i te feia hi'o ata, e te feia pifao; area oe ra, eita e tia i to Atua ra ia Iehova ia na reira oe." E mai te peu e ua pohe te hoê i te utuafare i te ma'i ra, ei tamaiti ia, e ei tamahine ia, eiaha roa e aratai ia'na i mua i taua mau huru diabololo haavare ra; e o tei na reira i te afairaa ia'na ra, aore ia oia i haapao i te hinaaro mau o te Atua ra. A hio i te Deut. 18:9-15.

A hio atoa outou i te raverāa o Iosia, i te fenua ra o Iuda, i te mau haamori varua ino, e te hi'ohi'o, e te teraphima, e te mau idolo, e te mau mea faufau atoa mai te reira te huru, tei itehia i taua fenua ra; ua faarue-ana'e-hia ia e Iosia. A hio i te 11 Arii 23:24-26.

Ua parau atura Ieremia i te paraurāa'e, eiaha roa'tu outou e faaroo i te mau peropheta haavare, e te pifao, e te feia taotooto, e te feia hi'o ātā, e te mau hi'ohi'o, i te peu e, e haavare ana'e ā ho'i ta ratou, e no reira eiaha e farii ia ratou ra. A hio i te Ieremia 27:9.

A haamano atoa outou i to Iesu faahaparaa i te mau Pharitea no te tiaturirāa i taua mau ohipa ra mai te faaitehia a'enei; "Ua parau atura oia ia ratou, na ô atura, Ia tae i te ahiahi ra, te parau na outou e, E riro i te raumai, e ra'i uraura. E ia poipoi ra, E verohia auanei; te uraura nei ho'i te ra'i e te rumaruma. E te mau haavare e, te ite na outou i te hio i te huru o te ra'i, aita rā outou e ite i te mau tapao o teie nei anotau? A hio i te Mataio 16:2-4.

E homa e, o outou na no Polinesia nei, a faarue roa atu outou i taua mau ohipa e taua mau peu tabito a to outou mau tupuna ra aore ia e faufaa ia tiaturi-faahou-hia; a vaiiho atu i taua poiri e te ite-ore-raa e e haere i mua i roto i te maramarama e i te ite, ia riro outou e feia mo'a e te maitihia na te Atua ora ra. E tia ia tatou ia ara maite a vai ai tatou i te ao nei, o te vare tatou i taua mana o te diapolo ra. A haapao ana'e ā rā outou i taua mana mau o te Atua ra, e na reira noa e tae noa'tu i te hopea, ia roaa ia tatou te ora i roto i To'na ra Basileia ra. E rave rahi te mau ohipa maere tei ravehia e te mau tahu'a, te mau hi'ohi'o, e te mau haapaoraa varua, i teie nei ā mau mahana; e ta ratou ra mana, no te diabololo ana'e ia; e a ara maite outou, eiaha e vare i taua mana ra, a haapao ana'e rā i to te Atua ra. E eiaha roa'tu e tiaturi i taua mau hi'ohi'o, e taua mau tahutahu e te mau haapaoraa varua, e taua mau tahu'a, e taua mau huru taata ra, mai

ta tatou i ite i rotopu i to te mau fenua rii o te moana nei. E te reira te mea e tia ia tatou ia haapao i teie nei mau mahana hopea nei. E eiaha e maere i te mana no teie mau taata ra. E ita hoi e maerehia; o Satani hoi tei faahua melahi atoa ia'na iho no te maramarama. E eré hoi i te mea maere rahi ia faahua tavini tana mau tavini no te parautia; e faaaahia to ratou hopea i ta ratou ohipa ra. Ahi'ó i te II Korinetia 11: 13-16.

Papaihia e

Garanata Lee Benesona



Nafea mai te Autahu'araa o Melehizedeka?

Te vare nei te hoê mau taata i te mana'oraa e, ua tae mai te Autahu'araa o Melehizedeka ra na roto mai i te heeraa mai te metua tane mai i nia iho i te tamaiti matahiapo. Ia hiapoa râ tatou i te haapiiraa mau a te Peropheta rahi no te mau mahana hopea nei, e taa roa ia ia tatou te huru mau o te haereraa o taua Autahu'araa ra.


Te na ô maira te pene 7 no te Hebera e, "E taua Melehizedeka, arii no Salema ra, e tahu'a na te Atua teitei, o tei farerei atu ia Aberahama i te ho'iraa mai, mai te taparahiraa i te mau arii ra, e ua haamaitai atura ia'na; o ta Aberahama i horoa mai i te ahura o te tufaa i te mau tao'a atoa; o te arii ia o te parautia te hoê auraa i ta'na i'oa ra, e i muri a'e, o te arii ia o te hau, oia hoi te arii o Salema. E taua Melehizedeka ra, ua faatoroahia ia ei tahu'a no nia i te haapaoraa a te Tamaiti na te Atua, aore e metua tane, aore hoi e metua vahine, aore e ihotatau to taua haapaoraa ra, aore e mahana matamua, aore hoi e hopea to to'na oraraa. E o ratou atoa o tei faatoroahia i taua autahu'araa ra, o tei riro atoa ia mai te Tamaiti a te Atua, i te haapao-tamau-noa-raa i te toroa tahu'a ra." Iritihia no roto mai i te Bibilia i faaafarohia e Iosepha Semita Metua.

Teie hoi te hoê â parau a te Peropheta no taua autahu'araa ra, "Te mau nei te Autahu'araa a Melehizedeka i te tia-raa mai ô mai i te Atua, eiaha râ na roto i te heeraa mai, mai te metua tane e te metua vahine mai, e to taua autahu'araa ra mure-ore-raa mai ta te Atua iho ia, aore e mahana matamua, aore hoi e hopea to to'na oraraa." *Iosepha Semita.*

Te fetia Mileniuma Buka 22 api 55.

Iritihia ei re'o Tahiti e

Aneterea Sedamana.



Mau Parau Api

Ua faaanapahia'e nei te hoê puohu paura (bomb) i mua i te fare moni no te hoê taata tao'a rahi i te oire Niu Ioka (New York). O Morgan te io'a o taua taata tao'a rahi ra. Ua parari roa taua fare moni nehenehe no'na ra. E 35 taata i pohe, e e 200 taata tei puta. Te mana'ohia nei e, na te mau taata orure hau (anarchists) taua ohipa ino ra i rave.

Ua maitihia te taata ra, o Herbert L. Samuels, ei taata faatere i nia i te fenua Palesetina, oia hoi Kanaana. E ati Iuda taua taata ra, e ua parauhia e, ua farii-maitai-hia oia e te mau taata no te fenua Kanaana.

Ua tonohia'e nei te hoê mau pahi rii tama'i no te Marite e te Baratane i te oire I-Chang i te fenua Tinito. Tei raro nei taua oire i te faatereraa o taua na hau e piti ra. Te tumu i tonohia'i te mau pahi manua i reira, no te mea ia e, ua orure te mau faehau Tinito no te reira oire e ua tutui ratou i te hoê mau fare i te auahi.

Ua pohe a'e nei te hoê taote tuiroo no te fenua Farane, o Chales Infroit to'na io'a. Hou rii a'e i to'na ra poheraa ua faaite mai te hoê vea no te oire Paris e, ua iriti taua taote ra i te hoe ofai pupuhi no roto mai i te mafatu o te hoê faehau

puta e ua ora roa taua faehau ra. Ua maere roa to te ao taa-toa i te aravihi o taua taote ra e i teie nei te oto nei raton i to'na poheraa.

Te haponono nei te hoê Totaiete Marite, o te mataro i te tauturu i te taata i te mau ati, i teie mau tao'a i faaitchia i raro nei i te fenua Autaria (Austria):

Totini 100,000 pea.

Tiaa 100,000 pea.

Ahu taoto 340,000.

E operehia taua mau ahua na te mau tamarii no te fenua Autaria.

E peapea rahi roa to te fenua Aielani (Ireland.) Te tupu noa nei te mau tama'iraa purumu i reira e te pohe nei te hoê mau taata i te mau mahana atoa. Te titau nei te hoê tufaa o te mau taata Aielani i to ratou ra tiamâ, oia hoi te hinaaro nei ratou i te faarue i te faatereraa o to ratou ra hau metua Baratane e faatia i te hoê hau apî no te mau taata Aielani ana'e.

Te faaite maira te parau apî e, ua rahi roa te taata Tapone (Japanese) i te fenua Vaihi (Hawaii). E 255,912 o te taatoaraa ia o te taata i taua fenua ra, e i roto i taua na taata e 255,912 ra, ua itea e 109,269 taata Tapone.

Ua riro te oire rahi no te fenua Aramenia i te mau nuu Rusia (Soviet). E ua riro atoa taua fenua ra ei republica (Soviet).

Te parare nei te ohipa orure hau na te mau fenua atoa, e ua parauhia e, ua rahi roa taua ohipa ino ra i te fenua ra o Paniola. (Spain).

Teie te faaiteraa o te hoê Sotaiete o tei haapii i te mau huru atoa o te tama'i rahi i hope a'e nei. E 9,819, 000 taat-

a i taparahihia i roto i te ohipa tama'i iho. E 5,301,000 taata i pohe i te mau huru ma'i o tei faatupuhia e taua tama'i ra. E 20,200,000 tamarii tei ore i fanau mai i roto i te ao nei no te mea e, e 56,000,000 tane tei pue i te ohipa tama'i, e ua taa-ê te mau tane e rave rahi i ta ratou ra mau vahine.

Ua tauatini e ua tauatini te taata i pohe i te poia i te fenua Tinito i na avae a'e nei. E o'e maa to reira.

I te tau mahanahana i mairi a'e nei, i te fenua Korea, ua pohe e 9,000 taata i te ma'i ino i parauhia kolera (cholera).

Te faatia maira te hoê taote tuiroo no te fenua Faraue e, e 2,000,000 vahine i taua fenua ra o tei ore e tia ia faaipoipo no te mea e, aore e taneno ratou. No te rahi o te mau tane i pohe i roto i te tama'i i hope a'e nei, ua hau roa te vahine i te rahi i te taioraa. Teie te ravea i mana'ohia e taua taote ra no te faafaitoraa i te taioraa o te mau tane e te mau vahine, oia hoi, e faaipoipo taua mau vahine Farane ra i te mau tane no te fenua California. O Paul Garnot te io'a o taua taote tuiroo ra e te tia nei oia i roto i te fare ma'i rahi i Paris i parauhia Beaujon.

Ua tupu a'e nei te hoê aueueraa feuaa iti rahi i te fenua Italia. E 1,400 taata i pohe i taua aueueraa fenua ra, e e rave rahi te mau fare e te mau oire tei mairi i raro. Ua tauatini e ua tauatini te taata aore a ratou fare e tao'a i toe mai i taua ati rahi ra.

I te 7 no Setepa i te oire Roto Miti, ua faaipoipohia te hoê vahine ruau roa i te hoê tane ruau roa'tu. E 95 to te tane matahiti, e e 85 to te vahine matahiti. Teie te io'a o te tane, o Mose (Moses V. Reeves). E to te vahine io'a, o Elizabetha ia, (Elizabeth Guest).

L. H. KENNARD Jr. Imprimeur, Rue Brea et de la
Rue Dumont d'Urville, Orovini, Papeete, Tahiti
